

Inuussutissarsiutilinnut MitID aamma Inuussutissarsiutilimmut inuttut MitID pillugit Kalaallit Nunaannut nalunaarut

MitID aamma NemLog-in pillugit inatsisip Kalaallit Nunaannut atuutilernissaanut peqqussummi nr. 2090, 2021-imeersumi § 4, imm. 2, § 5 aamma § 9, imm. 4, aamma § 10 malillugit aalajangersarneqarpoq:

Inuussutissarsiutilinnut MitID

§ 1. Nalunaarummi matumani Inuussutissarsiutilinnut MitID ima paasineqassaaq: NemLog-in-imi inuussutissarsiutilinnut allaffissornikkut sullissivik.

Imm. 2. Suliffeqarfinni oqartussaasunilu, Qitiusumik Suliffeqarfinnik Nalunaarsuiffimmi nalunaarsuisarneq pillugu inatsisartut inatsisaanni § 2 malillugu atorneqartumik CVR-normulinni, inatsisilerinermut immikkoortorta qarfiusunit Inuussutissarsiutilinnut MitID atorneqarsinnaavoq.

Imm. 3. Suliffeqarfittut atuisoq Inuussutissarsiutilinnut MitID-mi atuisutut suliffeqarfimmit oqartussaasumilluunniit pilersinneqassaaq aamma suliffeqarfiup kinaassusaanik asseqanngitsumik tassunga atasumik ataatsimik arlalinnilluunniit kinaassutsip ilisarineqarnissaanut atortorissaarummik imm. 4 malillugu elektroniskiusumik siunertamut tassunga sananeqartumik MitID-mut kinaassutsip ilisarineqarnissaanut atortorissaarutaasinnaasumik (app-imik, isissutissamik tuqassamik takutitsissummik, imaluunniit chip-imik) tunineqassaaq, imaluunniit Kalaallit Nunaanni inuinnarnut MitID pillugu nalunaarut malillugu atulersinneqartumik elektroniskiusumik MitID-mut kinaassutsip ilisarineqarnissaanut atortorissaarummik inuinnaat atugassaannik tunineqassalluni.

Imm. 4. Suliffeqarfik oqartussaasorluunniit Inuussutissarsiutilinnut MitID-mi suliffeqarfittut kinaassutsinik aamma suliffeqarfiup oqartussaasulluunniit suliffeqarfittut kinaassusaannik elektroniskiusumik siunertamut tassunga sananeqartumik MitID-mut kinaassutsip ilisarineqarnissaanut atortorissaarutaasinnaasumik atulersitsisinnaapput, atorunnaarallartitsisinnaapput imaluunniit matusisinnaapput. Elektroniskiusumik siunertamut tassunga sananeqartumik MitID-mut kinaassutsip ilisarineqarnissaanut atortorissaarutaasoq suliffeqarfittut kinaassutsimut atassuteqarpoq aamma inuussutissarsiuteqarnermut tunngasumik atorneqartussatut immikkoortinneqarluni. Inuup suliffeqarfinni oqartussaasunilu arlalinni Suliffeqarfittut kinaassuseqartup, tassunga suliffeqarfiup oqartussaasullu atulersitsisuuq akuersissuteqarneratigut, elektroniskiusumik siunertamut tassunga sananeqartumik MitID-mut kinaassutsip ilisarineqarnissaanut atortorissaarutaasoq aamma taanna atorsinnaavaa.

Imm. 5. Paasissutissat Inuussutissarsiutilinnut MitID-miittut, suliffeqarfimmit oqartussaasumilluunniit tunniunneqarsimasut, eqqortuunissaat nutarterneqarsimanissaallu suliffeqarfiup oqartussaasullu qulakkiissavaa.

Inuussutissarsiutilinnut MitID-mi suliffeqarfittut kinaassutsit

§ 2. Inuussutissarsiutilinnut MitID-mi suliffeqarfittut kinaassuseq pilersinneqarsimasoq, National Standard for Identiteters Sikringsniveauer (NSIS) malillugu uppernarsaatit atorneqarsinnaasunik suliffeqarfiup kinaassusaata ilisarineqarnissaanut atortorissaarummik elektroniskiusumik ataatsimik arlalinnilluunniit atassuteqarpoq.

Imm. 2. Suliffeqarfittut atuisup akuersissuteqarneratigut, Inuussutissarsiutilinnut MitID-mi suliffeqarfik oqartussaasorluunniit, suliffeqarfiup atuisup, Kalaallit Nunaanni inuinnarnut MitID pillugu nalunaarut malillugu atulersinneqartumik elektroniskiusumik MitID-mut kinaassutsip ilisarineqarnissaanut atortorissaarummik inuinnaat atugassaannik tunineqarsimasoq, Inuussutissarsiutilinnut MitID-mi suliffeqarfittut atuisup suliffeqarfittut kinaassusaata uppernarsarneqarnissaanut taakkuninnga atuissaaq.

Imm. 3. Inuk inuinnarnut MitID atorlugu digitaliusumik imminut kiffartuunnermigut Inuussutissarsiutilinnut MitID-mi suliffeqarfiup kinaassusaanik pilersitsisinnaavoq. Inuinnarnit suliffeqarfittut kinaassutsip pilersinneqarnerani Danmarkimi Digitaliseringsstyrelsi kinaassutsimut uppernaqqutissiisuvoq.

Imm. 4. Suliffeqarfik oqartussaasorluunniit NSIS-imut nalunaarutigineqartunut sumiiffinni kinaassutsimut uppernaqqutissiisutut atuussinnaavoq aamma inuinnaasup Inuussutissarsiutilinnut MitID-mi suliffeqarfiup kinaassusaanik pilersitsinerani, inuinnaap sumiiffimmi kinaassusaata qulakkeerneqarnissaa suliarisinnaallugu.

*Inuussutissarsiutilinnut MitID-mi suliffeqarfinnik oqartussaasunillu pilersitsineq,
atorunnaarallartitsineq aamma peersitsineq*

§ 3. Inuussutissarsiutilinnut MitID-mut suliffeqarfiit oqartussaasullu pilersinneqarnerat, atorunnaarallartinneqarnerat aamma peersinneqarnerat pillugit, Danmarkimi Digitaliseringsstyrelsi sinnerlugu Nets DanID A/S aalajangiisussatut Danmarkimi Digitaliseringsstyrelsip toqqarsimavaa.

Imm. 2. Pisuni tulliuttuni suliffeqarfik oqartussaasorluunniit Danmarkimi Digitaliseringsstyrelsip Inuussutissarsiutilinnut MitID-it atorunnaarallartissinnaavaa imaluunniit peersissinnaavaa:

- 1) Piumasaqaatit qaqugukkulluunniit atuuttut, www.mitid-erhverv.dk-mi takuneqarsinnaasut suliffeqarfiup oqartussaasulluunniit eqqortinngippagit.
- 2) Ataatsimut isigalugu inuinnarnut, suliffeqarfittut atuisunut imaluunniit Mit-ID-mut imaluunniit NemLog-in-imut isumannaallisaanikkut navianartoqarpat.

Imm. 3. Imm. 2, nr. 1-imiit 2 ilanngullugu malillugit atorunnaarallartitsinermut pissutaasut atorunnaarpata, Danmarkimi Digitaliseringsstyrelsip atorunnaarallartitsineq atorunnaarsissinnaavaa.

Inuussutissarsiutilinnut MitID-mi suliffeqarfiup oqartussaasulluunniit pilersinneqarnera

§ 4. Inatsisilerinermik immikkoortortaarfik digitaliusumik imminut kiffartuunnermigut Inuussutissarsiutilinnut MitID-mi suliffeqarfittut oqartussaasutulluunniit pilersinneqarneq noqqaassutigisinnaavaa.

Imm. 2. Inuussutissarsiutilinnut MitID-mi pilersinneqarnermi Danmarkimi Digitaliseringsstyrelsimit piumasaqaatit aalajangersakkat qaqugukkulluunniit atuuttut, www.mitid-erhverv.dk-mi takuneqarsinnaasut, inatsisilerinermik immikkoortortaarfup akuerissavai.

Imm. 3. Suliffeqarfiup oqartussaasulluunniit digitaliusumik imminut kiffartuunnermigut Inuussutissarsiutilinnut MitID-mi pilersinneqarnerani, inatsisilerinermik immikkoortortaqarfik atorneqartumik CVR-normoqassaaq, aamma inatsisilerinermik immikkoortortaqarfiup paasititsineratigut, Qitiusumik Suliffeqarfinnik Nalunaarsuisarfimmi inatsisilerinermut immikkoortortaqarfimmi inuinnaap piginnaatitaasup taaneqarsimasup kinaassusaata paasineqarnissaa periarfissaassaaq.

Imm. 4. Imm. 3 malillugu piginnaatitaasup kinaassusaata paasineqarnissaa periarfissaanngippat, inatsisilerinermik immikkoortortaqarfiup Nets DanID A/S Inuussutissarsiutilinnut MitID-mi suliffeqarfiup oqartussaasulluunniit pilersinneqarnissaa noqqaassutigissavaa.

Imm. 5. Imm. 4 malillugu pilersitsineq inuinnaasup piginnaatitaasup kinaassusersineqarnerata aamma pineqartup inatsisilerinermik immikkoortortamut ilaanerata uppersarsineqarnerata kingorna pissaaq. Inuinnaap piginnaatitaasup kinaanerani uppersarsaniarluni Nets DanID A/S-ip kinaassutsimut uppersarsaatit CPR-normortaqaanngitsut takutinneqarnissaat piumasaqaatigissavaa. Aammattaaq inatsisilerinermik immikkoortortaqarfimmut tassunga piginnaatinneqartup ilaanerata uppersarsarneqarnera Nets DanID A/S-ip piumasaqaatigissavaa, taamaaliorneq assersuutigalugu pilersitsinermut takussutissiaasinnaavoq, suliffeqarfimmit imaqarniliornerusinnaalluni aamma suliffeqarfiup ileqqorequsaaniissinnaalluni, kisianni taakku tassunga killilerneqanngillat.

Imm. 6. Imm. 5 malillugu kinaassutsip uppersarsarneqarnera uppersarsineqarneralu periarfissaanngippat, suliffeqarfittut oqartussaasutullu inatsisilerinermik immikkoortortaqarfiup Inuussutissarsiutilinnut MitID-mi pilersinneqarnissaa Nets DanID A/S-ip itigartitsissutigissinnaavaa.

Inuussutissarsiutilinnut MitID-mi atuisunit aqutsineq aamma allagartat akuersissutit

§ 5. Suliffeqarfik oqartussaasorluunniit Inuussutissarsiutilinnut MitID-mi Suliffeqarfittut atuisut pisinnaatitaaffinnik atuuffinnillu tunniussisinnaavoq, tamatumalu malitsigisaanik suliffeqarfiup oqartussaasulluunniit Suliffeqarfittut atuisoq suliffeqarfik oqartussaasorluunniit sinnerlugu digitaliusumik imminut kiffartuussineq pillugu aaqqiinerni iliuuseqarsinnaanermik piginnaasaqartilissallugu.

Imm. 2. Inuussutissarsiutilinnut MitID-mi pilersinneqarnermi, minnerpaamik Suliffeqarfittut atuisoq ataaseq, suliffeqarfiup oqartussaasulluunniit allaffissornikkut aamma ikkunneqarnissaanut akisussaasoq (suliffeqarfimmi oqartussaasuniluunniit aqutsisoq) suliffeqarfiup oqartussaasulluunniit toqqassavaa.

Imm. 3. Inuussutissarsiutilinnut MitID-mi allagartat akuersissutit atulersinneqarsinnaapput, taakkulu Suliffeqarfittut atuisunit elektroniskiusumik atsiornernut atorneqarsinnaapput aamma suliffeqarfinnit oqartussaasunilluunniit elektroniskiusumik atsiornertut imaluunniit naqissutitut atorneqarsinnaallutik. Allagartat akuersissutit imaluunniit elektroniskiusumik sullissivinnut tamanut atugassiat pillugit pisortanit allagartat akuersissutit eIDAS pillugu peqqussummit malittarisassiuunneqarput (OCES-imit allagartat akuersissutit).

Imm. 4. Pisinnaatitaaffinnik allagartanillu akuersissutinik Suliffeqarfittut atuisunik suliffeqarfiup oqartussaasulluunniit tunniussinera allaffissornikkullu ingerlatsinera, suliffeqarfiup oqartussaasulluunniit nammineq ilumini malittarisassai naapertorlugit pissaaq, matumani atsiorsinnaanermut malittarisassat, ileqqoreqqusat il.il.

Imm. 5. Allagartat akuersissutit atornerlunneqarnissaanut navianartoqarpat, imaluunniit pisuni suliffeqarfiup oqartussaasulluunniit imaluunniit Suliffeqarfittut atuisup allagartamut akuersissummut

piumasaqaatit qaqugukkulluunniit atuuttut, www.mitid-erhverv.dk-mi takuneqarsinnaasut eqqortinngippagit, Inuussutissarsiutilinnut MitID-mi allagartat akuersissutit atulersinneqartut matuneqarnissaat Danmarkimi Digitaliseringsstyrelsen aalajangiiffigisinnaavaa.

Suliffeqarfiutilimmut inuttut MitID

§ 6. Inuinnaq Qitiusumik Suliffeqarfinnik Nalunaarsuiffik malillugu kisimiilluni inatsilerinermik immikkoortortaqaarfik sinnerlugu atsiorsinnaasoq imaluunniit kisimiilluni inatsilerinermik immikkoortortaqaarfimmik sinniisuusinnaasoq, inatsilerinermik immikkoortortamut suliffeqarfimmut sinniisuuniarluni, suliffeqarfittut oqartussaasutulluunniit Inuussutissarsiutilinnut MitID-mi pigineqartumik siuliani nammineq pilersitseqqaarani, Inuussutissarsiutilinnut inuttut MitID-minik atuisinnaavoq (MitID Suliffeqarfiutilimmut inuttut MitID).

Imm. 2. MitID Suliffeqarfiutilimmut inuttut MitID Suliffeqarfiutilimmut MitID apeqqutaatinnagu atornerqarsinnaavoq. Taamaattoq inatsilerinermik immikkoortortaqaarfik taamaallaat suliffeqarfittut oqartussaasutulluunniit pilersinneqarnerup kingorna Suliffeqarfiutilimmut MitID-mi atortorissaarutini atuisinnaavoq.

Naammagittaalliorsinnaaneq

§ 7. Nalunaarut manna malillugu aalajangiinerit Danmarkimi Digitaliseringsstyrelsimut naammagittaalliutiginneqarsinnaapput.

Imm. 2. Naammagittaalliutit suliarineranut paasissutissat suugaluartulluunniit pingaaruteqarsinnaasut Danmarkimi Digitaliseringsstyrelsen Nets DanID A/S-imit tunniunneqarnissaat piimasaqaatigisinnaavaa.

Atuutilerfia

§ 8. Nalunaarut ulloq 6. november 2023 atuutilissaaq.

Digitaliserings- og Ligestillingsministeriet, ulloq 30. oktober 2023)

Marie Bjerre

/ Tanja Franck